

**Kadar Miskin Tegar Malaysia Susut Kepada 0.28 Peratus - Bank Dunia**  
**MStar Online**  
**28 Mac 2016**

KUALA LUMPUR: Paras kemiskinan Malaysia mencatat peningkatan ketara dengan tahap miskin tegar berkurangan kepada 0.28 peratus berbanding kedudukan sebagai antara yang tertinggi di dunia kira-kira empat dekad lalu, kata Bank Dunia.

Ketua Pakar Ekonomi yang juga Naib Presiden Kanan Bank Dunia, Kaushik Basu, menyifatkan perkembangan itu jauh lebih baik berbanding negara-negara tertentu seperti Nigeria yang mana tahap kemiskinan tegarnya melonjak kepada 53.5 peratus daripada 46 peratus bagi tempoh sama.

"Kira-kira separuh jumlah penduduk (Malaysia) adalah di bawah paras US\$1.90 (pada 1980-an) sehari. Hari ini, paras kemiskinan itu merosot kepada 0.28 peratus.

"Ini jelas menunjukkan bahawa peningkatan secara dramatik sudah berlaku," katanya pada majlis pembukaan pejabat Kumpulan Bank Dunia di sini, Isnin.

Hadir sama, Gabenor Bank Negara Malaysia Tan Sri Dr Zeti Akhtar Aziz.

Menurut Kaushik, antara sasaran ditetapkan oleh Bank Dunia adalah supaya paras miskin tegar global dapat dikurangkan kepada tiga peratus menjelang tahun 2030.

"Pada masa ini, kadar kemiskinan global adalah sebanyak 12.7 peratus yang agak mendukacitakan, namun ia tidaklah seteruk mana jika dibanding keadaan pada asalnya," katanya.

Beliau turut memuji kejayaan Malaysia yang sebelum ini menjadi negara bergantung kepada segelintir hasil komoditi kepada ekonomi moden yang pelbagai.

"Ketika banyak negara terjejas teruk akibat kejatuhan harga komoditi global, Malaysia sebaliknya terbukti dapat mengelaknya selepas dapat melakukan transformasi daripada sebuah negara miskin, pengeksport komoditi kepada negara moden dengan ekonomi yang pelbagai," katanya.

Kaushik turut menyarankan negara-negara untuk belajar mempelbagai, mengeluarkan beberapa sumber ekonomi yang berbeza dalam jangka panjang serta berdagang dengan dunia.

"Pelaburan dalam modal insan juga harus dilakukan kerana itulah penggerak utama pertumbuhan negara bagi jangka panjang," katanya.

Tags / Kata Kunci: [miskin tegar](#) , [Bank Dunia](#)

**Hakcipta Terpelihara © 2016 Star Media Group Berhad (ROC 10894D) (Sebelum ini dikenali sebagai Star Publications (Malaysia) Berhad)**

Source: <http://www.mstar.com.my/berita/berita-semasa/2016/03/28/miskin-tegar-susut/>